

B. N. C.
FIRENZE
1059
32





XXXVII

SORB

1059

1059

32



23.
CLEMENTIS IX.
PONTIFICIS
OPTIMI MAXIMI
I C O N.

EX EPISTOLA
VIRI CLARISSIMI
SAMVELIS SORBERII,

Ad Illustrissimum Virum,
*D. HENRICVM LVDOVICVM
HABERTVM MOMMORIVM,
Primum Libellorum Supplicum Magistrum.*



PARISIIS,
Excudebat Antonius Vitré, Regis & Cleri Gallicani
Typographus.

M. DC. LXVII.



Handwritten text at the top of the page, possibly a title or header.

OF THE

...

...

...

...

...

...

...

...

...

...

...

...

...

...

...

...

...

...

...

...

CLEMENTIS IX.
PONTIFICIS
OPTIMI MAXIMI
ICON,

EX EPISTOLA VIRI CLARISSIMI
SAMVELIS SORBERII.

Ad Illustrissimum Virum;
*D. HENRICVM LVDOVICVM HABERTVM
MOMMORIVM, Primum Libellorum
Supplicum Magistrum.*



IR ILLVSTRISIME,

In superioribus meis, Lugduno datis, pollicitus eram, me pluribus ad te scripturum circa viros à me, & tuo nomine salutados Literatos Viros, quos Vrbs illa plurimos habet tibi amicos. Susceperam quoque de Speculo ustorio acturum me cum insigni illo Villeta, Operario; quem, nulli parcens sumptui, sollicitas pridem, vt consimile paret illi, quod curiositati tuæ subreptum

delatum fuit in Daniam, ceu Artis Catoptricae miraculum, & ad Mathematicorum, atque Physicorum stuporem. Ægrè fers enim, VIR DOCTISSIME, Galliam nostram hisce ornamentis carere, & ab exteris nationibus aliò deportari hujuscemodi ad philosophandum circa res naturales adjumenta. Sed tanta fuit properantia mea ad semel auditum de exaltatione Eminentissimi Cardinalis IULII ROSPIGLIOSII nuncium, vt nullas ad te alias literas discedens dare potuerim. Nam itineri me statim commisi, CLEMENTEM IX. veneraturus. Dimissis igitur omnibus negotiis, nullâ autem habitâ tempestatis ratione, Syrio fervente, & Ultramontanis Romam adeuntibus infestissimo, Alpes superavi, & totam penè Italiam trajeci, ad nulla planè attendens, quæ notatu digna occurrebant; adeò erat defixa mens in SIDVS illud OLORIS; in Cynosuram illam pietatis, doctrinæ, & bonæ mentis, quam Orbi Christiano exoriundam sæpiusculè mecum optaveras; ex Icone in Musæo meo conspectâ, & ex Epistolis plurimis pereruditis, de virtute Viri rectè judicans. Et sanè imitatus sum aliquatenus in ista mea festinatione, & ἀπειροκαλία, seu rusticitate, Elizæi Prophetæ famulum, qui nec retrorsum, nec dextrorsum, sinistrorsumve respexit, nec quemquam obvium salutavit. Vix enim in Musæum Septalij oculos detorquere Mediolani dignatus sum; vix cum Patre Ricciolo; quanto me hercule inter Iesuitas Viro! Bononiæ paucis egi; vix Cassini lineam Meridionalem in S. Petronij Templo descriptam respexi; vix Semonem illum, Pianessæ Marchionem, Augustæ Taurinorum obiter miratus

miratus sum in Cœnobio delitescentem , vt Deo se totum traderet, qui annos totos quadraginta Sabaudicæ Aulæ ita impenderat, tot sustinens & tanta negotia solus, vt nullis tamen non disquisitionibus Philosophicis, Theologicis, vel alio quocumque modo ad summam vel politioem eruditionem spectantibus, Iudex acerrimus, interfuisse videatur. Atque ita me gessi omninò, vt Romam vnice spiraverim, & in ea Summum Pontificem. Flare mihi videbatur medio in æstu aura quædam suavissima, quâ impelli me sentiebam. Conflabatur autem ea ex vocibus omnium de præcellenti Virtute bene existimantium, exoriebaturque veluti concentus cæli, solique, hominum & Angelorum huic electioni acclamantium. Mira enim vbique lætitia, & ex corde proveniens, nec in labris natans apparebat. Mira, inquam, quum non solùm occuparet in Urbibus Viros doctos, vel rerum politicarum peritos; sed spectaretur quoque passim mediis in agris, in rusticis & plebeculâ, quam mirabar adedò gnaram esse causæ cur ita gestiret. An aurigas ipsos memorem, nautas, cauponesque malignos, qui laudibus suis ad cælum extollebant Viri Sanctissimi pietatem, & illa ipsa non infacundè prædicabant, quæ grandiori tubâ occinebant alij majoris momenti testes non rejiciendi. Quod quidem Divinâ prorsus inspiratione factum putabam in ista hominum fœce, quæ ad instar Asinæ Balaami potest aliquando Prophetam agere, vel oportuna proloqui, juxta vetus illud,

Πολλάκι καὶ μᾶλλον αὐτὸς μᾶλλον χεῖρον ἔτιπεν.

Quidquid illius sit, VIR ILLUSTRISIME, nullus vnquam Mortalium ad summos honores pari cum

applausu erectus fuit, nullus majorem de se expectationem concitavit, nec ullus unquam tanta pollicitus est Christianæ Reipublicæ bona, quanta præstiturum CLEMENTEM IX. conicere fas est ex iis, quæ intra hos duos menses præstitit; dignos planè tam excelsò, ac Divino Principatu spiritus ille gerit; nihil sapit humile in commune bonum, atque adeò (quavis ad ista non attendat) in Nominis sui gloriam immortalem. Quam ille non quæret in lapidibus & cæmentis coacervandis, quæ in quacumque molem exsurgant humilia, videntur magnis ingeniis, omne Immensum mente, animoque peragrantibus; neque in iis bonis comparandis, quæ Pontificio nomini indecora, vsus tamen superiorum temporum licita quodammodo fecisse videbatur. Ad munus ille suum attendens seipò, jugiterque considerabit humanâ quâ parte locatus sit in re. Qui Principem enim ager, recordabitur idem se Christi Vicarium esse, & Petri Successorem, ad quem spectat in puppi navis sedere; ovili invigilare, scopulos vitare, in æterna pascua oves compellere, & ad æternæ salutis portum appellere. Hisce autem incumbenti quanta laudis non marcescentis seges veniet metenda? Quanquam enim Spiritus Sancti ductu cuncta gerantur (quæ quidem pertinent ad Doctrinam, ac Disciplinam Ecclesiæ) in istâ Petri Cathedrâ, in partes tamen veniet consummatissima CLEMENTIS IX. prudentia & Religio. Revocabit ille mores antiquos, & Summorum illorum Pontificum memoriam renovabit, quos ardens evexit ad Sydera virtus, quos Ecclesia Catholica defunctos meritò colit, quorum dies festos

celebrat quorum intercessionem Populus Christianus, implorat. Bonum istum Pastorem nostrum profectò non spectabunt querelæ Michaëlis vestri Hospitalij, de Summorum quorundam Pontificum ambitione, & avaritiâ, vel scominata ab Hæreticis in S. Sedem Apostolicam perperam conjecta propter humanitùs passos aliquid Summos Pontifices, privatæ Domûs suæ potiore, quàm Reipublicæ rationem habentes. Quod cum aliquando contigerit fortasse Senibus optimis, nimîâ quâdam indulgentiâ, vel in suos proclivitate (quibus scilicet adhuc junioribus, imperitioribusve, vel à regno Dei alienis, non satis subacta fuit mens in rerum maximarum contemplatione) nullatenùs extimescendum in isto Pontificatu. Eodem enim Divino Spiritu, quo **SVMMS PONTIFEX** ducitur, & **FRATER** insignis pietate Vir, & **NEPOTES** Regiæ planè indolis ac virtutis, & in Domo prænobili, atque hospitalitatis, & Religionis laude præstanti liberaliter educati, ducuntur, quod omnibus in rebus luculenter præ se ferant; omnes infra se positam despicientes *καυχήται*, & ad Patruj, Heroïs Maximi, & Sanctissimi magnanimitatem assurgentes; Qua in re ejus felicitatem non minimam puto. Fratrem **CAMILLVM** ego non vidi, qui Romam nondum venit, moderatione vsus sapientissimâ, dum in patriâ suâ Pistorij, re à Majoribus suis Nobilissimis relictâ gaudens amplissimâ, magnam partem bonorum suorum impendit Eleemosynis, & communis pater pauperum dudum perhibetur; à quo instituto nequaquam ille deflectet. Filios ejus jam vidi; qui Patris & Patruj vestigiis insistent, & Viri-juvenes sunt

modestissimi ; non rudes rerum Politicarum ; Eques præsertim Hierosolymitanus, qui diu , multumque peregrinatus est ; qui verò habitu sunt corporis decoro , & ad Principatum nato , atque multiplici facundiâ pollent , præcelsi ; quò assurrexêre loci gravitatem , & innatam animi fortitudinem moribus suavissimis , & multâ comitate temperantes. Et tales quidem visi VINCENTIVS & THOMAS natu minor. Nam de IACOBO Illustrissimo illo Abbate Rospi gliosio , nuper Internuncio , quid referre possum , quod jam vobis non innotuerit , quandoquidem , & in Comitatu Legati ante aliquot annos Lutetiæ exoriens vti Sol ætherius , Stellas præstrinxerit , Patruo suo CLEMENTI IX. veluti prælucens ; magnam verò dehinc in Belgio , tum rursùm Lutetiæ , prudentiæ suæ admirationem pariens , Aulæ vtrique acceptissimus. Cujus sanè Incomparabilis Viri spectata Virtus non parum contulit , vt in vnum convenirent Coronæ , semper aliàs in eligendo Summo Pontificè adeò dissidentes. Quæ vix vnquam enim eundem Cardinalem probaverant , pari studio eundem nunc Gallia & Hispania Eminentiss. IULIVM ROSPIGLIOSIVM expetiêre , & à Deo concessum ingenti gaudio excepêre. Nomen ille sibi CLEMENTIS imposuit , habitâ ratione mansuetudinis suæ , cuius sibi conscius , & quam intemeratam servare constituit ; cuius autem specimina jam edidit plurima. Panem aliàs , & Circenses Populus Romanus poscebat : At ille statim panis caritatem minuit , & vêtigal ademit , quod ad millions , vt vocant , binos , censum , seu sortem principale m redditus Cameræ Apostolicæ adaugebat.

Et

Et mira est notanda in prolato Edicto Summi Pontificis clementia. Nam ut famæ ALEXANDRI consuleret, pronuntiavit, id mentis fuisse Antecessori suo, quamvis ALEXANDER nunquam fortasse id executioni mandaturus fuisset. Imò cum aliquis suaderet Sanctitati suæ, ut in altera parte Numismatis, quod cudendum de more erat in adipiscenda possessione Basilicæ Lateranensis, incidi juberet verba imminutum vectigal indicantia, renuit ille constantissimè, laudem egregij facinoris referens in ALEXANDRVM. Et in Lateranensi quidem leguntur ista, *IPSE DOMINVS POSSESSIO EIVS, Lem. x. 9.* In alio vero Numismate, quod cudi quotannis solet circa anniuersariam diem S. Petri, allusit ad eam diem, quâ creatus est Pontifex, quæ cum fuerit vigesima Iunij, S. Sylverio Pontifici dicata, memor constantiæ, quâ Vir Sanctissimus in Insulâ Pontiâ exilium tulit, hæc addidit, *CONSTANTIA SYLVERII AD IMITANDVM PROPOSITA.* De charitate autem & miseratione in pauperes, de liberalitate & munificentia, quæ aurifodinas faciliè totas exhauriret, multa prædicarem, nisi mihi compertum, sapienter illum sibi temperare, ut habeat unde in egenos elargiatur, vel quod in majoris momenti impensas, vel ad vrgentiora negotia convertat. Quod factum vidimus nudiustertiùs erga Rempublicam Venetam, auxilio præsentì egentem, propter Candiam à Turcis obsessam. Nam cum à Legato significatum fuisset quibus in angustiis Serenissima Respublica versaretur, nullum aliud responsum CLEMENS IX. dedit quàm Schedulam, in qua jubebatur Præfectus Ærarij solvere Venetæ Reipublicæ quinquaginta millia aureorum,

professus *Ærarium* se exhaustum reperiisse. Sed cum probè sciat, liberalitatem perire liberalitate, nec possit tamen ad eò pessulum obdere virtuti nobilissimæ, quin indulgeat aliquando ingenio suo liberali; quæ ille munera spargit, tantâ exornantur elegantia, ut pluris decuplo fiant, & dantis habitum quisque possit animadvertere; quem nemo negarit in liberalitate primas obtinere. In pauperes igitur quodcumque potest subtrahere aliis impensis totum illud infumit, & quotidie pauperibus duodecim cibos ministrat ad Sanctorum veterum Pontificum instar, quod semel tantum in anno, ab aliis fieri solitum fuit. Atque ut in univrsum Populum suum manet ejus liberalitas, & cura paterna, Congregationem instituit *DE LEVANDIS ONERIBVS* nominatam, in qua rationes incuntur, quibus possit Populus levare tributis, ut rem quisque priuatam lautiores possideat. Quod fermè ante nostra tempora inauditum, & primum à *LVDOVICO XIV.* Rege Christianissimo excogitatum, qui de Opificiis juvandis, & de Mercaturâ promovendâ, atque de Artibus Mechanicis perpoliendis non ita pridem in Galliâ nostrâ ad eò sollicitus fuit, ut Academias in hunc finem cruditorum, atque peritorum & spectatorum hominum confessus statuerit. Antequàm ad hæc felicissima *CLEMENTIS IX.* tempora pervenissemus, horas tantum matutinas negotiis publicis impendere solebant Summi Pontifices, cum penè totas pomeridianas animi remissionibus traderent; unde non facilè admitti poterant Subditi, quorum intererat, ut petitiones, vel querelæ in aures Principis rectè deponerentur. *CLEMENS IX.* negotiis semper

vacat, obuius est omnibus; nec dies vlla prætermit-
 titur, in qua aditus ad SANCTITATEM SVAM
 non pateat. Placidè autem & renidenti vultu, vt Solij
 maiestatem acclivem faciat, nulli non adeunti aures
 suas commodat, animos addit infanti pudore præpe-
 ditis, ac veluti obstetricatur infacundijs, vt penitùs
 pernoscat de quibus conveniatur, & in hominum
 mentes descendat. Nec debet sileri, quàm sit memor
 veterum amicorum, atque clientum, vel de se aliquâ
 ratione, etiam minimâ, benemeritorum. Cujus sum-
 mæ benignitatis insigne testimonium in me quoque
 præbuit, zeli mei fervorem celebrans, ac (vt ita di-
 cam) amicè mecum agens. Neque verò prætermitt-
 endum, quàm generosè deleverit ex animo injuria-
 rum memoriam. Quanquam enim mitis ejus sapien-
 tia præstiterit vt minus illis obnoxius fieret, non de-
 fuère tamen malè feriati forsitan nonnulli, qui secùs
 quàm par erat nonnunquam egerint, quorum tamen
 ille videtur non meminisse. In quibus autem Palatij
 sui locis fiunt Congregationes Cardinalium, vel Præ-
 fulum ad tractandas res ad regimen Ecclesiæ Catho-
 licæ spectantes, curavit aperiri fenestras, velo tamen
 obductas, ex quibus clanculùm interesse possit Con-
 sultationibus, Consultoresque in officio retinere, qui
 Principem semper præsentem habent. Invigilat au-
 tem præsertim in Ecclesiis Episcopo quamprimùm
 donandis, iisque Viris probis, doctis & sapientibus,
 quos fraudare debitâ mercede non vult, quo muneris
 dignitatem tueri, & si quid supersit Eleemosynis reli-
 quum impendere possint. Ad quod attendens signifi-
 cavit, non fore deinceps locum Pensionibus, quibus

mediocres aliquando redditus Episcoporum gravantur in favorem Cardinalium; quos non semper Romæ morari debere septuaginta magno sumptui obnoxios existimat: Quum necessarium è contrà judicet ut Episcopi in Diœcesibus suis resideant, & pauperum, atque animarum sibi commissarum curam gerant. Nec satis arbitratur ex æquo factam huc-usque divisionem bonorum, quæ Cardinales aliquos divitiis facit pares Regibus, dum cæteri angustè degunt, & egestate premuntur; cui tollendæ nequaquam redditus Ecclesiarum inservire debent, quum sit aliundè potius istis prospiciendum. Hos inter labores indefessos mirum Senis, nec admodum validi, infirmatam non fuisse valetudinem; quæ potius summo Dei beneficio vires acquirit, & longævitatatis indubiam spem facere videtur. Quæ quidem in totius Orbis Christiani utilitatem, decus & ornamentum cedit. Itaque precibus apud Deum contendere debemus, ut novo semper corporis, quemadmodum & animi robore donetur; quo possit latus interesse Populo Quirini, vel potius Christi *φιλοσοφῶν*, & res humanas sapienter, quâ cœpit ratione moderari. Neque enim extimescendum ne segniùs aliquando in isto tramite incedat; quandoquidem famulis suis, vel amicis subinde rogantibus, ut sibi consulat, & virium suarum, atque ætatis rationem habeat, respondere solet, positum se à summo rerum Moderatore illo in loco, in quo nequaquam est quiescendum. Quippe omissiones quoque in Pontifice periculosissimas esse; & quo plura sibi à Deo commissâ, eò majorem esse debere rerum, quarum ratio reddenda, sollicitudinem; neque

que adeò aliis committendum quidquid ipse præstare potuerit. In ore autem habet jugiter illud Apostoli, *Non facio animam meam pretiosioreme quam me*; & quâ pollet doctrinâ, atque eloquentiâ, *ambrosio* (vt tua verba agnoscas) *quo solet ore loqui*, alia subnectit plurima, quæ fidem faciunt, quo bonæ mentis parato commeatu ad Imperium pervenerit. Subnectam quæ in primo Consistorio, cum gratias ageret SACRO COLLEGIO CARDINALIVM, pronuntiavit: *Cum Sanctissimi Pontificis Leonis documento, non verecunde, sed ingrata mentis indicium sit, beneficia tacere Divina; Primum agimus, ac semper acturi sumus humillimas gratias Omnipotenti Deo, qui nostram humilitatem respexit supra meritum, supra votum. Deinde, vt ejusdem Leonis Magni verbis utamur, vestra quoque humanitatis arbitrium debitâ gratiarum actione concelebramus, qui nullis precedentibus meritis tale de nobis judicium protulistis. Hinc imbecillitati nostra gemina exoritur in tanti oneris discrimine subsidij spes: Altera ex prapotentis Dei patrocínio, ex consilio vestro altera. Certum enim est, nos non modò agere non posse aliquid, sed ne cogitare quidem à nobis, tanquam à nobismetipsis; sed omnem sufficientiam nostram esse à Deo. Ideoque gaudemus, hâc spe freti, fore vt Clementissimus Dominus, qui ad ostendendas divitias Omnipotentie sue vocat ea qua non sunt, tanquam ea que sunt, nobis abundè impertiatur eam Divini Spiritus auram, quâ feliciter in tot sæculi fluctibus Ecclesie navim regamus. At nunquam navis regitur à solo Nauclero. Prævidere is potest pericula, cursum ordinare, instruere vela; sed eget consilio, ac ope multorum.* Igitur

vestra consilia nobis esse perquam necessaria intelligimus. Nam ex Oraculo Spiritus Sancti; ubi multa consilia, ibi salus. Ideoque uti par est, vos in consortium laboris advocamus. Communis erit omnium nostrum in calo merces, si in Ecclesie rebus adjuvandis communis fuerit labor. Et vestra interest, ne Christiana Respublica iudicio vestro in nos eligendo inter tot sapientiâ, virtute, atque experienciâ præstantissimos Patres fraudatam se conqueratur. Nos certè non faciemus animam nostram pretiosiore, quàm nos, nec refugiemus laborem aliquem, qui ad nostri Ministerij partes adimplendas conferre possit. Hoc animo, Divinâ favente Clementiâ, vestrisque coadjuvantibus virtutibus, quas nobis nunquam defuturas speramus, libenter humeros, quamvis longè impares, tanto oneri subjicimus.

Ex hisce poteris, VIR ILLVSTRISSE, cognoscere ex vngue Leonem, & qualis, quantusque sit CLEMENS IX. animadvertere. Quorum, siquidem tibi consultum videatur, Amicis nostris communibus copiam facies, ut qui prænuntiaverunt tot Carminibus, ceu Oraculis totidem, Solis istius adventum, jam exorto gaudeant. Tu vale, VIR MAXIME, & perge mihi favere, qui Virtutem, Ingenium, Doctrinam, & Pietatem tuam semper sum veneraturus. Romæ, Eid. Augusti A. S. R. M. DC. LXVII.



1054.32
c

99 95885



